

ONE SAQWE D' BON

Nos n'avans rin à-z-aprinde aus djon.nes d'audjoûrdu, nos-ôtes. Maîs quî ç' qui saurè co dire, dins saquants-anéyes, li gos' di l'amougnî?

Èst ç' qui vos v' sov'noz bin
do pwin cût su l' for qu'on s' rilèveut dèl nèt po-z-è mougîn?

Èst ç' qui vos v' sov'noz bin
do bûre di cinse qu'on plaqueut su s' tårtine?

Èst ç' qui vos v' sov'noz bin
dèl crausse sope qu'on lomeut, è nosse maujone, li sope di batelîs?

Èst ç' qui vos v' sov'noz bin
dès sorèts èt dès canadas pètés qu' nosse pa mougneut à r'lètche dwègts?

Èst ç' qui vos v' sov'noz bin
do tchirou da matante Lètine, qu'i-gn-aveut qu' lèye po l' fé insi?

Èst ç' qui vos v' sov'noz bin
come ça sinteut bon quand nosse man cûjeut dès rôbosses?

Èst ç' qui vos v' sov'noz bin
dès din.nés d' curés qu'èle fyin.n' nos vîyès mârines?

Èst ç' qui vos v' sov'noz bin
do djoû qu'on touweut l' couchèt èt qu' c'èsteut djoû d' fièsse?

Èst ç' qui vos v's-è sov'noz co bin? Èst ç' qui vos v's-è sov'noz co bin?

Si vos v's-è sov'noz co bin, vos-èstoz ritche au d'la. Non.na, ni riyoz nin. C'èst l' pure vèrité. Ni galvaudoz nin cès bèlès sov'nances là. Aurdoz-lès èt lès paurtadjî avou vos-éfants èt vos p'tits-éfants.

Li pus p'tite a brâmint crèchu. Èle n'a jamais rovî lès sov'nances do timps qu'on touweut l' couchèt. Èle a div'nu one madame èt r'cîre pus sovint qu'à s' touû. È s' maujone, pont d' "pizza", pont di "hamburger", pont d' "fish stick". Lèye, èle ni sièt qu' do bon. Lès-agnons do djârdin tchantenut è l' paîle, lès pomes ont stî coudûwes tot timpe au matin èt lès coquias vègnenut tot drwèt dau poli.

On djoû, èle apudrè à sès-éfants èt à sès p'tits-éfants à fé à mougîn à môde di djin.

Èt c'è-st-insi qu'i-gn-aurè todi, todi, one saqwè d' bon quand on s' mètrè al tauve.

A.-M. FRANCOIS